

Convenio de Colaboración entre a Consellería de Cultura, Lingua e Xuventude e a Fundación Galicia Europa para a realización de programas de información sobre a Unión Europea e de proxectos de cooperación europea, destinados á xuventude galega, no exercicio 2025.

MEMORIA DE TRANSPARENCIA

A directora xeral de xuventude da Dirección Xeral de Xuventude da Consellería de Cultura, Lingua e Xuventude, Lara del Carmen Meneses Álvarez.

DECLARA

Que esta Consellería de Cultura, Lingua e Xuventude ten previsto formalizar coa entidade Fundación Galicia Europa o instrumento convencional arriba referido por un período de vixencia que abrangue dende a data da sinatura do convenio ata o 31 de decembro de 2025.

Que o instrumento convencional ten por obxecto:

Establecer as condicións polas que se rexerá a colaboración entre a Consellería de Cultura, Lingua e Xuventude e a Fundación Galicia Europa para o financiamento por parte da primeira de actividades desenvolvidas pola segunda para difundir oportunidades da Unión Europea entre a mocidade galega durante o ano 2025.

Que as actividades que a Dirección Xeral de Xuventude, a través do convenio, contribuirá a subvencionar serán as seguintes:

- a) A oficina virtual de información #EuroXuventude.
- b) A Guía de prácticas e saídas profesionais na UE e Organizacións Internacionais 2025.
- c) A difusión en INSTAGRAM dos contidos de *#EuroXuventude*.
- d) A interacción entre a Dirección Xeral de Xuventude e a FGE en redes sociais.
- e) Obradoiros de orientación sobre oportunidades da UE para a mocidade.
- f) Apoio a organización de visitas de grupos de mozos e mozas galegos a Bruxelas.



g) Organización dun encontro virtual Xunta – UE sobre políticas de Xuventude.

Que para o financiamento das ditas actividades, a achega financeira da Consellería de Cultura, Lingua e Xuventude será dun total de vinte e un mil catrocentos euros (21.400,00 €) con cargo á partida orzamentaria 13.05.313A.443.02 dos orzamentos xerais da Comunidade Autónoma para o ano 2025. O crédito dispoñible desagregarase do seguinte xeito:

- Persoal asociado á actividades: 3.800€
- Asistencias Externas: 17.400€

Que os gastos subvencionables unicamente serán aqueles que, de xeito indubidable, respondan á natureza das actividades que formen parte do obxecto subvencionado a través do convenio, descritas na súa cláusula segunda, a realizar entre o 1 de xaneiro e o 31 de decembro de 2025.

Que o instrumento convencional que se pretende asinar se fundamenta no seguinte:

1. A Fundación Galicia Europa creouse ao amparo do artigo 34.1 da Constitución española e réxese pola Lei 12/2006, do 1 de decembro, de fundacións de interese galego e normativa de desenvolvemento, inscrita no Rexistro de fundacións de interese galego, con número 1988/1. Foi declarada de interese galego pola Orde do 24 de maio de 1988 e resúltalle de aplicación a Lei 16/2010, do 17 de decembro, de organización e funcionamento da Administración xeral e do sector público autonómico de Galicia, en concreto, o artigo 118 de réxime orzamentario, económico-financeiro, de contabilidade e de control, e o artigo 119 de auditoría e control; dependente do padroado, coa composición e funcións que se determinan nos seus estatutos.

A Fundación Galicia Europa foi creada para promover todas aquelas accións que propicien o achegamento entre Galicia e Europa, centra o seu labor en defender os intereses de Galicia ante a Unión Europea, promover a participación galega en proxectos europeos, e informar, formar e sensibilizar sobre a Unión Europea en Galicia. A Fundación, xa dende os seus inicios, recoñece a xuventude galega como unha das principais destinatarias da súa actividade de carácter informativo, de formación e de sensibilización sobre asuntos europeos, desenvolvendo actividades específicas baixo a denominación "EuroXuventude".



2. A Consellería de Cultura, Lingua e Xuventude é o órgano superior da Xunta de Galicia ao que compete levar a cabo, entre outras, a súa política en materia de xuventude segundo o disposto no Decreto 49/2024, do 22 de abril, polo que se fixa a estrutura orgánica das consellerías da Xunta de Galicia e no Decreto 146/2024, do 20 de maio, polo que se establece a estrutura orgánica da Consellería de Cultura, Lingua e Xuventude. A dita consellería, a través da Dirección Xeral competente en materia de xuventude é a responsable da Rede Galega de Información Xuvenil, para a consecución dos obxectivos propostos no Título V do Decreto 50/2000, de 20 de xaneiro, polo que se refunde e actualiza a normativa vixente en materia de xuventude e no Capítulo II da Lei 6/2012, de 19 de xuño, de xuventude de Galicia. Rede que ten como obxectivos asegurar que as prestacións de servizos de información xuvenil se desenvolvan en condicións axeitadas, garantir a difusión de información xuvenil ampla e actualizada en todo o ámbito da Comunidade Autónoma de Galicia, así como favorecer a implantación dos mecanismos de información precisos para posibilitar a igualdade de oportunidades entre a xuventude galega.

A dita consellería considera que, como medida para afrontar a demanda de información sobre Europa e a multiplicación de iniciativas para a xuventude, cómpre o establecemento de accións que dean resposta de maneira axeitada ás demandas dos mozos e mozas, establecendo unha estreita coordinación coas canles de información establecidas na Rede Galega de Información Xuvenil.

Dada a traxectoria da Fundación Galicia Europa na súa labor de defensa dos intereses de Galicia na Unión Europea e especial dedicación á difusión de información sobre asuntos europeos entre a mocidade, a Consellería de Cultura, Lingua e Xuventude considera esencial a colaboración con esta entidade.

3. Esta colaboración manifestarase mediante unha subvención de 21.400 euros por parte da Dirección Xeral de Xuventude para o financiamento das actividades da Fundación Galicia Europa expostas na cláusula segunda do convenio de colaboración.

De acordo co artigo 29 dos seus Estatutos, a Fundación Galicia Europa financiará as súas actividades cos recursos que proveñan do rendemento do seu patrimonio e, entre outros, con aqueles outros procedentes das subvencións que poida percibir dos entes públicos.



Como último fundamento, declarase que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos considerados na Lei 9/2017, do 8 de novembro, de contratos do sector público, ou outro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2 da Lei 1/2016, do 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase dixitalmente esta memoria, en Santiago de Compostela.

A directora xeral de Xuventude,

Lara del Carmen Meneses Álvarez

